



17 OKETOPA 2022 ~ Lomiga 13 ~ Upega Tafailagi: www.ola888.com ~ Telefoni: 0210364322 ~ Tuatusi: ola.niupac@gmail.com ~ evaleon.books@gmail.com ~ NIUPAC Publication

OTOOTOGA

SU LE A'OGA

O le tama'ita'i faia'oga lausilafia, Siouxsie Wiles, o loo ia suina lana a'oga, lunivesite a Aukilani, e mafua i le mataupu i le puipuia o le 'aufaigaluega mai le faama'i o le Koviti-19. O le finau a Wiles, e le'i faia e le a'oga le mea e gata ai e puipui ai le 'aufaigaluega mai lamatiaga o le faama'i. O lo'o faatali se fa'aiuga o le mataupu.

FA'AAUAU TETE'E TEU

O lo'o fa'aaauu le tete'e a faia'oga o lunivesite ma politeki a le atunuu, e mafua i o latou totogi. O le 'auga o le finau, ua le ogatusa le tele o galuega e fai ma le taugata o le tau o le soifuaga ua iai. Atoa fo'i ma nisi mataupu taugaluega o loo atugalu ai faia'oga. Tele faia'oga ta'utino i le le 'a'u o le faasoia i le totogiga o pili masani.

VALA'AU E TULI LE PULE

O loo feagai se a'oga i Aukilani ma se nunu i le va o matua ma le pulega. E aga'i tonu le faasea a matua i le pule ma lana faaiuga e faafaigaluega se faia'oga fesoasoani (TA), tainane na ia iloa lona tala'aga faaletonu. Na iloa ane sa molia o ia i lona fai o se faiga'aiga faamalosia i se teine. E aiga le pule ma le o lo'o tuua'ia. Ua faamavae le faia'oga fesoasoani, e o loo finau matua mo le pule ia faamavae fo'i.

AUT LA'ALA'A I LUMA

I le faatulagaga o iunivesite a Niu Sila i o latou tulaga ta'uleleia ua tula'i mai ai le AUT i le numera 2 i le fua a le THE (Times Higher Education) mo le tausaga 2023. O se la'a maoa'e lea pe a manatu sa tulaga 8 le AUT i le vasega e lei mamao atu. Molimau le alii pule, Damon Salesa, e faafetaia le ma'elega o le 'aufaigaluega. Avea ai le AUT ma se tasi i totonu o le li'o o iunivesite e 300 laualuga a le lalolagi.



MASAGA TOLU MAOA'E: Chanel, Chloe ma Roselle, o le masaga tolu a Jacqueline ma Rohan Samaratunga, nonofo i Henderson, Aukilani. Afua mai i Sri Lanka le aiga, na fananau le masaga i Niu Sila i le 2000. A'o'oga ma maua ai avanoa sikolasipi e ulufale i le Lunivesite a le AUT. Uma faatasi faau'u faatasi 2022. O Chloe o lana mataupu o le geospatial science, o Roselle o le food science, ma Chanel o galuega faapisinisi. Ua maua uma a latou galuega ma o loo nonofo pea ma o latou matua.

E tino mai le matagofie i se fe'au o le agalelei e te faia

I le pitonuu o New Brighton i le itu i sasa'e o Kalaiesetete e iai le matafaga e igoa ia Brighton (ata).

O le nofoaga lea e faatino ai le faiva o Peter Donnelly. E ese fo'i lona faiva, o ia o se tufuga tusiata i luga o le oneone.

O se tasi lea faatufugaga o le talutalufou ua a'e mai. E lua ituaiga, o lena e fofoa se faatusa i foliga o se mea moni, e fa'aaoga ai le oneone. Ma le isi e tusi se ata i luga o le oneone.

To'atele tagata o le taulaga ua silafia o ia, feoloolo fo'i i latou e muli'auloa lona faiva i Niu Sila ma fafo atu.

E leai se tau o lana galuega ae fai ona o le lagona e fia faasoia atu se fe'au o le fiafia e ala i se ata, i soo se tasi e asia le matafaga.

E umi se taimi e tusi ai se ata, i lana pulumu tusiata o se lake saluvao, ae a sua mai le tai e vave ona tafua.

Faafetai ua mafai ona faasoina se kopi i se ata e pu'e ma taofia.

Ta'utino le alii tufuga o lenei faiva na faasoina o ia mai se olaga faigata, ma o lona ala lea i le sa'olotoga ma se olaga faamalieina.

O le manulauti tauave a Peter, e leai se tau o le agalelei e te faia mo isi. Na o lou taimi ma se lake e mana'omia, atoa ma se aso laofie.



Asiasi fo'i i le tatou upega ola888.com mo se fa'aopoopoga i lau faitau.

TALA O LE VAIFANUA: LEVI TAVITA

Poloa'iina le tapunia o le a'oga sa a'oga ai Malaki (Malachi)

UA TAPUNIA NEI le a'oga sa a'oga ai Malachi Subrecz, o le tama na maliu 'ai lima o le sa tausitama ai.

O le nofoaga e tausi ai tamaiti i Tauranga, le Abbey's Place Childcare Centre, o loo tuua'iina fo'i i le faalavelave, ina ua manino tolaulauga o le mataupu i le faamasinoga.

E aga'i tonu tuua'iga i faia'oga ma le pulega i le faatamala i le faia o la latou pitola'au. Tusa i tolaulauga, sa iloa e faia'oga faailoga o manu'a i lona tino ae na latou 'apoina le upu a le tausitama, o Malachi na sulu ma afaina ai. E 17 tausaga i le toese le faasalaga o le na molia.

Ua tuua'iina fo'i le pulega i le leai o se gaoiga na fai, aemaise i se tulaga masalomia o le agavaa o le tausitama, sa tatou ona latou silafia.

O le faaiuga a le Matagaluega e tapuni le nofoaga e faavae i lona le ausia o tapulaa sa poloa'iina ai i lalo o se laisene nofo vaavaaia, talu ona tula'i mai le faalavelave.

Sa ta'ua i le iloiloga le le mautali o le pulega i fesili sa siligia ai i le maliu o Malachi. O lea na tonu ai loa e faagata lana tautua.

O le Abbey's Place e lua ona lala, o le tasi i Tauranga ma le isi i Putaruru. E to'alua ni aiga e pulea le pisinisi, lea ua faamuta nei i le pule a le Matagaluega o A'oga, faamamalu i le aso 7 o Oketopa, 2022.



Nofoaga autu o le fale tausitama Abbey's Place o loo tuua'iina le pulega ma faia'oga i le mataupu ia Malaki poo Malachi

Na iloga fo'i ni faitioga i le Matagaluega e nafa ma fanau a le atunuu, le Oranga Tamariki, sa fesoota'i ma Malachi e ala i lona tina faapea le tausitama.

Tele taofi fa'aali i le mau ava i le tala, le ama o le vaai a le Matagaluega i faailoilo, aemaise o le agavaa o le tausitama. Talu ai e le fou le maliliu o fanau i ni fetuuna'iga faapea, fai ai se maliliega i le va lelei o se matua ma se tausitama, sa tatau ona fai se siaki mae'aea o le agavaa o le tausitama e faamau ai le saogalemu o Malachi.

Sa siligia le faauluuluga o le matagaluega e le aufaasalalau tala, ma ia ta'ua ai le le 'a'u o le faasoa tauseleni. E mafua ai ona le tulitulia pe va'ilili toto'a nisi o mataupu e pei o lenei ia Malaki.

E le fou foi le mataupu i le maliliu o fanau i tausitama ae pei ona ta'utino loa, o se malaia lenei e mafai ona taofia pe 'ana fai se galuega lavea'i a le a'oga, atoa ma aiga o le tausitama sa iloa le mea o loo tupu ae ufiufi.

(Taga'i foi i le faasoa o le vaiaso).

Leiloloa ni galuega ona o le fai ifo o le numera o le lola a'oga

E LE O SE FUAINUMERA laitiiti le 355 galuega e ono leiloloa i le tausaga fou, pe a taunuu le valo'aga a le Matagaluega o A'oga.

Talu ai le fai ifo o le numera o fanau ua to'esea mai potua'oga, ua le mautonu ai pulega o a'oga ia latou fuafuaga faata'oto mo le 2023.

O le tasi vaega taua o na fuafuaga o le faatulagaga o le aofa'i o vasega e fua i ai le numera o le 'aufaigaluega. Ae pei ona atagia i le fa'aaliga, ailoga e mafai ona faasaoina se pasene feoloolo o le aofa'i ua valo'ia.

O le mamafa o le la'au e pa'u i a'oga tulagalua ma kolisi, aemaise lava tulagalua.

E tele mafua'aga, ta'ua a le Minisita Lagolago o A'oga, Tinetti. Muamua le faauilavea a le Koviti19, mai le lua tausaga talu ai e aulia mai lenei taimi. O loo iai pea a'oga i se tulaga le mautinoa.

Tele a'oga o loo tau saili a latou tamaiti ma aiga poo fea ua o i ai, ua lipotia le tu'ua e nisi o sone a'oga sa iai e aunoa ma le logoina o a'oga.

Atili le le mautonu i lenei vaitau o le fai a'e i luga o le tia'i a'oga.

Fa'aalia fo'i e le minisita e faapea e iai a'oga e le o fa'aaogaina tonu tupe sa togia mo le aofa'i o faia'oga sa talosaga ai. O nisi a'oga e le ono maua i latou na o loo tau saili, o isi foi e te tupe faaagaga mo nisi fuafuaga.



Foliga fiafia o se tasi a'oga pe a ma se 'afa o lona aofa'i e fai mai i totonu o Niu Sila, o se ata lava lea mo isi foi a'oga.

Sa faailoa e nisi pule le mana'omia vave o se fesoasoani mo fanau e mafua i le Koviti19. E iai i latou ua leva ona tu'ua potua'oga ma mana'omia ai ni fe'au faauilavea e so'oina ava e mafua mai ai.

O le finau a le NZPF, se tasi iuni a pulea'oga i le atunuu, e tatau i le matagaluega ona taumau i le numera e masani ai, e maufetuuna'i ai le pulega i le tulaga o fanau nei e fia maua le fesoasoani.

Saunoa lona sui, ua iloa le fesuisuia'i o numera aemaise i le amataga o le a'ega muamua.

Moni la e leiloloa galuega a nisi ae telē le avanoa e toe fo'i atu ai i potua'oga pe a gasolo ane aiga fou e faatumu le ava ona o le o ese o isi.

O le faafitauli o le le lava o faia'oga o se tasi mataupu fa'aauau i le faasoa lautele. E fa'aaoga fo'i e vaega faaupufai e finau ai so latou 'ai i taimi o faigapalota. E mafua ai ona saili se faigamalo i fafo atu, lea ua amata ona gasolosolo malie mai se vaega i totonu, ina ua tatala tapu o femalaga'iga ma le lalolagi.

TALA A'OGA NIU SILA:

Vala'au e taofi le faiga e vaevae ai vasega i atamai o tamaiti

O le vaevaeina o vasega e fua i atamai o fanau o se faiga ua masani ai mai tausaga e tele.

O leni faiga ua lu'iina nei e nisi o tautai o le faiva, taulamua ai le pulega a le iuni o faia'oga o le kolisi, PPTA.

O le lafo faatu a ni sui o le PPTA, ua tatau i le matagaluega ona vaoia leni faiga, ma ua faatu mai fo'i ma le aso e tatau ona faagata ai, 2030.

I se fono sa faia a le iuni i Ueligitone, na folasia ai le lafo ma faailoa fo'i le mafua'aga e tatau ai ona lagolago le faatu.

Muamua, o se faiga faailogalanu leni, auā ua iloa lava le tulaga o loo lilifa i ai le laufanua a'oga i nei aso, i le tasi itu o fanau atamamai ae le to'atele, ma le isi itu o fanau vaivai ae iloga le to'atele.

O leni tulaga le paleni e le tatau ona alu a'i, saunoa mai e lagolagoina le lafo. Afai o le sini o soo se malo temokarasi o le ola tutusa ma avanoa tutusa fanau uma i faamanuiaga, e le fesoasoani le faiga o loo mulita'ia nei.

O se faiga foi e faailogatagata, e iloa mamao atu lava le vaeluaga o se malo i alo ma fanau a papalagi ma e lelei tamaoiga, ma le isi itu i fanau Maori, Pasefika ma isi e pito i lalo i le faasoaga o le tamaoiga.

LOU SOIFUA MALOLOINA: O SE FAAMANATU A LE TAIMI

O lou tiute muamua faatagatanuu o lou soifua maloloina

I LE FEAGAI AI o atunuu o le lalolagi ma le Koviti19, ua avea ma to'atuga i a'oga a le fanau ma fuafuaga a a'oga, ua le mapu ai le faamanatu a tautua eseese tau le ola maloloina, i auala e faanofomalie ai i leni taimi.

O lu'i aupito lata mai mo fanau ma le to'atele o lagona o le popole ma le le mautonu. A tele le popole ma le atu, e fua mai i ma'i o le tino ma le mafaufau. Ma o'o atu ai i nisi o gasegase tuga e ono lamatia ai le ola pe a le vave sa'ili fofo.

Saunoa le alii foma'i, Dr Karl Jansen, i le tulaga fai a'e o ma'i i le mafaufau, e le faapito i se matua. O nisi o fanau sa ia togafia e 7-8 tausaga le matutua. Ae feoloolo fo'i i latou ua pulapula-la-goto le soifua. E to'atele fo'i talavou a'oga o loo ia va'aia, mai le 12 tausaga i luga.

O le fe'au lava lea o loo molimoli e tautua i luga o le laina, o le fa'amoemoe ia 'apo gofie e le to'atele, aemaise tupulaga talavou.

Fai mai le taofi o se foma'i matua, o lo tatou tiute muamua faatagatanuu o le tausisi lelei o lo tatou ola maloloina. E le o le palota poo se tasi mea, a o le mafaufau maloloina, auā e faalagolago i ai mea uma. A ma'i le tino ma le mafaufau ua afaina le galuega, a mama'i se malo ua afaina le tamaoiga lautele.

Ta'utino le foma'i i le taua o le inivesi o se malo i le ola maloloina o ona tagata.



NA O SINA PASENE: E faatauva se pasene o fanau e tulagaese le atamamai, ae le tatau ona laaloa ai le vaai a se atunuu

I le faiga o loo ta'ua, e vaevae ai fanau i o latou mafaia faalea'oga ma faaleatamai. I nisi a'oga e iloa lava i igoa o vasega, vasega popoto e ta'u o le A, ma faasolo atu ai e tau lava i le E pe sili atu fo'i.

Molimau foi nisi su'esu'ega i le vaevae o faia'oga i o latou atamai ma le potomasani. E ave ai faia'oga aupito agavaa i vasega aupito malolosi. E peisea'i ua iai se maliliega lē lea ma autasi, e inivesi se a'oga ia latou fanau atamamai ae le i fanau uma.

Ua iloa foi le afaina o fanau i leni faiga, e le gata

ua saga faamautuina ai le faasinoesea o nisi, a o ila i lagona ma manatu o nisi fanau, e matua aafia ai o latou lumana'i.

Finau mai se faipepa i leni fono, o se fe'au sese o loo molia e leni faiga, ma ua sau le taimi e tatau ai ona tilofia se faiga fou.

E iai fo'i isi faiga o loo mulita'ia e isi malo, e iai le tuufefiloi o tamaiti, e pei ona faia e le malo o Finelani. Ua iloa a'oga a lea malo o se tasi aupito manuia mo fanau uma, molimau su'esu'ega.



TAEAO I NELESONI: Pei fo'i o isi taulaga ma o latou taeao; e maua fua e leai se tau, ae faamoemoe i lo tatou fa'aogaina lelei

E fa ni fautuaga taua e afea soo i faasoa a foma'i i leni mataupu. Muamua, faasao se taimi e alu ai i fafo i le la. I le mafanafana o le la e maua ai e le tino le vaiamini D. O lena e faatupuola i le mafaufau ma lagona fesuisuia'i. O lona uiga e le su'egata lea vaila'au. E maua fo'i le vaiamini D i i'a e pei o le samani ma na e maua ai le suau'u.

Lua, to'aga e tausami au fuala'au faisua ma Fuala'au ota. Ua iloa le 'augata o fanau e fa'aaoga nei taumafa, peita'i e leai se isi auala. O se amio i le tele o aiga le 'alofia o fuala'au, ae tatau lava ona faamasani i ai ona o le taua i le ola maloloina.

Lona tolu, e taua tele le faamalositino. Poo le a lava le ituaiga faamalositino, a ia taumafai e tausisia lea i se faiga fa'aaauu. Molimau foma'i e le o le mamafa poo le umi o le taimi a o le tausisia o se gaioiga. Ae le ta'ua fe'au masani i le fale.

Ua le o toe fesiligia le sootaga o le faamalositino ma suiga maoa'e i le mafaufau ma le tino, e tuufaafegai ma lena o se tino e le gaoioi, e vave ona 'apoia e ma'i.

Ma lona fa, o le tausisia o se olaga paleni, e nofoilo ai le tagata ia i lona tausiga i le tino, mafaufau ma le loto. Talu ai e amatamea le tino, o lena foi le lu'i mo le to'atele e ao ona ave i ai la tatou faamuamua.

TAUTUA UPU: O SE MOTUGA'AVA

Maualaivao: Tusitala o le 60 tausaga o le malo Samoa



AFAI E IAI se faalupega 'Tusitala a Samoa i le 60 tausaga o lona Tuto'atasi, e le faatali lenei tautua i sana Ioe lapo'a, e leai se isi ua tataua ma onomea i ai le fa'aaloalo.

Afua mai i vaitausaga onosefulu lona faiva, o loo fa'aaauu pea e aulia mai lenei aso. E le tau faailo le tamaoiga i le faaso, i le vao fatufatuga i talafatu, o fatuga uumi ma pupu'u, o solo ma tala faakoneseti, ae le ta'ua le taleni tusiata na mulia'i mai i lana tautua faa'umi'umi.

E le to'atele ni tufuga Samoa e tusa pau le ta'uta'ua ma le amana'ia i totonu o Samoa ma fafo atu. Ae e ono finau mai se isi, e sili atu lona lauiloa i le lalolagi nai lo Samoa. E sili atu lona fa'aaloaloga e Niu Sila nai lo Samoa.

Faamamalu e le iunivesite a Aukilani ma Hawaii, faafetaia e uso a tangata whenua a Aotearoa, faamamalu e le malo o Niu Sila i lana pine taualoa aupito maualuga, faamamalu i le suafa o lona aiga, o molimau i le agaga faamalieleina i le tautua matavela.

Pau se fe'au e atagia mai ai, e le mamafa na'ua le faiva o le fatua'iupu i o tatou tagata—gagana Samoa ma le Peretania fo'i.

E to'afia ni e ua feiloa'i atu ia Lalolagi, Faleasa Osovae ma lona to'alu o Felefele, Tauilopepe, Pepe, Olanaileoti, i ana tala?

E le'i iai lava se faaliliuga o ana galuega i la tatou gagana, o se tasi lea molimau i sona amana'ia faaleiloga mo le to'atele o tatou tagata. Ae mautinoa e leai se isi o lenei tupulaga e le'i tali faalumaga i le faiva o Maualaivao, ma mauafia i ana fo'i taumafaiga, aemaise ni fe'au taua o le olaga mai ona manatu, ma se lagona faatupu fiafia e pei o le sini o soo se fatuga.

Ua iloa le o vaavaalua o le atina'e o se malo ma lona tulaga maualuga i le literasi. E mafua ai ona pele ana tufuga fatuupu ma faatufugaga e tau i ai. O le tasi lea itu taua o le iai o se tofiga taualoa, e faailo le taua o le galuega fatua'iupu i le atina'e o se atunuu. E ta'u atu i le fanau e taua le faiva o le tusitala, e amana'ia e Samoa faiva faafatua'iupu. Aemaise, e toto se fatu e lei toina muamua, auā le lumana'i o se nuu.

Moni e le masani ai Samoa, ae atonu ua fotu malama o suiga lelei e le siligia. Tatou faamasani e patipatia a tatou taleni, aemaise e ua ta'uta'ua ai le igoa o Samoa i le lalolagi. Fai mai le upu, Avatu le faamalo i e ua tataua i ai. E iai le Afioga ia Maualaivao Albert Wendt.

TA'UTINOGA PUUPUU MAI LE FALEA'OGA O LE OLAGA

Faitautusi o le ki e faasa'olotoina ai



O A'U o se matua Samoa ma o la'u tautinoga lenei mai lo'u potomasani i le falea'oga o le olaga.

Sa ou ola a'e i se aiga e vaivai le tamaoiga, peita'i sa maua lava mea'ai o le aso, ui ina taufaasoaso i nisi taimi. E o'o fo'i i le tulaga o a'oga e tau leai ni api ma ni peni, ae sili ona tau leai ni tusi faitau mai le a'oga.

Ae na matou laki ma o'u tei auā o lo matou tina o se e fiafia e faitau tusi. O soo se mea e tau i ai e aumai i le fale—o se nusipepa, o le Fetuao, o le Sulu Samoa. Sau i nisi aso ma se tusi a Fanaafi, e faitau faafia ae matou faalogologo, ma isi tusi nonō mai i ana uo faia'oga. E o'o i mekasini a le Molimau a Ieova e talia ma le fiafia, auā e taugofie le tau, na o le faafetai.

O le si'osi'omaga lea na faaosofia lo'u naunau ma le fiafia e faitau. Fa'aopoopo i ai ma le Tusi Paia, ma o'u faia'oga e fiafia e faitautusi, na avea o ni faamatua e faamuina le afi na sasao ma avea ai tusi o ni mea e pele ia te a'u.

Fai mai le upu, E fau e le masani le amio. Alu a'i avea le amio ma se tu e ola ai. E tuu faasolo mai i matua i fanau ma aveavea'i o se tu e tausia e se aiga poo se nuu foi.


I la'u galuega o se faia'oga, ou te faamalosi atu i matua i le taua o le vave faamasani o fanau i tusi, ma atia'e le faitau e avea ma se tu masani i le fale. Ua iloa le sootaga o ausiga mata'ina ma le faitautusi, molimau su'esu'ega.

Ou te piitia le faatusa a se tasi i le mafaufau mu'amu'a o se eleele fou, e to ai fatu lelei. Ae lelei ona vave amata a o fou le taeao. A nofoa'i, e toe fai atu ua vela le la, velasia fatu, ma mamate ai. E te le faatali se'i o le fanau i le a'oga, amata nei loa sau polokalame faitau tusi ma le fanau, a o maua le avanoa e fai ai.


EVALEON BOOKS & NIUPAC PUBLISHING

Telefoni 02102567412 ~ Imeli: evaleon.books@gmail.com


I LE faamanatuina o le 13 tausaga o le OLA Puletini, ua ofoina atu ai nisi a matou lomiga i tau nei ia Setema ma Oketopa




\$5.00 NZ




\$5.00 NZ



\$5.00 NZ



\$5.00 NZ



MA ISI FO'I TUSI FESILI MAI

\$5.00 NZ

FA'ASOA O LE VAIASO: LPS LEVI TAVITA

Ua moomia vave e Niu Sila se 'ato agavaa i le tausiga o fanau

MANATUA LE alii o Malachi Subrecz! (ata). Ioe, e le vave galo ia i latou sa mulita'ia le tala ia te ia, ma lona maliu 'ai lima o se fasioti tagata, Michaela Barriball (ata).

Mo e le'i silafia, o Malachi, 5 tausaga (Malaki i lenei ripoti), sa tausiga e Michaela, 27, o le uo a lona tina o loo i le to'ese. O le maliega a le tina na mafua ai ona va'ai e Michaela lana tama a o to'esea.

Peita'i na iloa ane i mea na tutupu e le alofa i ai le tausitama, pe faapea foi, o ia le Faamata'u Sili na i'u ina fano ai le ola o Malaki.

I le taimi na nofo ai Malaki i le fale o le tausitama, na tutupu ai mea nei: na ia taumafai e lelemo o ia i le tapu vai, na ia taumafai foi e susunu i le vai vela o le paipa na ki i le 70 tikeri. Na faalua ona toggi i le puipui o le fale ma iloga ai ni manu'a i lona tino.

Na iloa e faia'oga o lana a'oga, ae foliga ua talitonu i pepelo a le tausitama, ma faapea ai ona 'alofia se su'esu'ega mae'ae'a. Ana se mea e fai le tiute o faia'oga e logo le pulega (Oranga Tamariki), e mautinoa e ono faasaoina o ia, auā e lei aunoa lena ma le isi faao'oga manu'a na maliu ai lava, ina ua siliga togafiti a foma'i.

Na ta'utino le Oranga Tamariki i lona faatamala, ta'utino fo'i le Minisita i lona faatamala, ae ilā ai ma le malo o loo faamalumu ifo i nei faatinoga uma. O le Oranga Tamariki o le foafoaga a le Leipa, ma e tele ni folafolaga o suiga e fia fai, i le taimi na tatala ai, e liuina le faama'i tuga o le limatete i fanau.

O le fesili, o ai tonu e tuua'iina? Mo Malaki, e tuua'iina i latou uma. Ona matua ma le aiga, o e na faia tonu mo ia, e aofia ai le na tausia ma e tau i ai. Ae mamafa le tuua'iga i le a'oga ma faia'oga. Auā sa le tatau ona tupu sea faalavelave pe 'ana fai le tiute o le a'oga: saili mae'ae'a pe faauilavea auā lona puipuiga.

E foliga o mea uma e tutupu e aga'i lava le tuua'iga i le malo. A le a'oga tamaiti e tuua'i le malo. A fia aai tamaiti e tuua'i le malo. A ua tatou iloa lava e iai le tua'oi o le pule a le malo. E le mafai foi e ni tulafono ona faatonutonu le saua o nisi matua i fanau e le iloa atu.

O se faama'i faalekelope lenei e le fuatasi ia Niu Sila poo se malo. E talitonu fo'i le faaso'a e le o se faafitauli e fitoi tonu i le na o se aganuu a o le fua o suiga o'oo'ua ua lofia ai nuu uma.

Fai mai se tasi faitofa ua saosaoa suiga a ua itiiti pe leai foi se faavae mau i tu ma aga tauleamio, e taofi iumaea i le tulaga fetineia'iina ma lu'itauvale o le olaga faaonaponei; le aunoa se faasinomaga i se aganuu poo le Atua fo'i, e tapasaina le olaga.

O le iuga o le gaogao faaleagaga e faatumu i soo se mea, e limata'ita'iina e lagona ma faalogona faaletagata. O faalogona ua le mafai ona paoina pe faatonutonuina e se malosiaga e sili atu.

Muamua le faalogona o le ita. E foliga o se aga fou faalekelope, le afo'i o le ita ua aga atu i fanau. A ita se tasi, ona alu lea i se lotoa a'oga e tafana le fanau a'oga—ma faia'oga. Ua pei nei o ni fagogo tagiao le fetalai'a malo i ituaiga sauaga faapea.

Ua logo le lalolagi i le faalavelave mata'utia i le malo o Tailani, 36 maliliu e aofia ai se 22 fanau iti o se A'oga Amata. I le faatinoga a le na faia, e faigata ona talia i le mafaufau lelei le mata'utia, pe a manatu ua na o ni 'alu'alutoto o loo fai i ai. O o'oga na o le ita. E o faatasi ma se mafaufau ua sola ona o le pule a le vaia'au (Methamphetamine).

Aisea le fanau? Pe ona o le fanau o ni taula'iga faigofie e le mafai ona tali mai? E foliga e leai se muta'aga o le fetu'u ua tula'i mai i lo tatou lalolagi.



A o talanoa le lalolagi ia Tailani a o loo silamio le lalolagi i faiva o Putin, i le tineia o ola mu'amu'a o le faitau selau ma selau fanau a Ukurane (Ukraine), ona o polotiki o le pule.

E o faatasi le sauaina o fanau ma tina. Tatou te le tilotilo mamao auā o loo tupu lava i lalo ifo o le malu o tatou aiga, nuu, malo ma mafutaga. E iloga nuu na e le amana'ia aiatatau a tama'ita'i, o na foi o loo mauiluga ai le afaina. O malo fo'i na e tautu i taofi faalelotu ma faaleaganuu e ta'umaulalo ai fafine.

E leai se Tusi Paia faalekelope e ta'iala ai le tausiga o fanau poo se aiga. Ae tasi le mea ua iloa, e mafuli le faafitauli i le itupa o alii. O i latou e umia le pule i le tele o sosaiete, e 'aumalolosi, to'atele e feita lē taofiofi ma ave'a ai o se pule mata'utia i mafutaga ma āva ma fanau. E le pine o le fesili, o a ni faauilavea malolosi e faaleleia ai i latou nei. Muamua i le onosa'i ma le faapalepale, le mautomai i auala e tali atu ai i le ita. Faapefea ona pulea le 'ava ina 'aia ona ave'a ma se fili faatupu faalavelave i aiga?

Sa ta'ua e le faaso'a i se taimi ua alu le taua o le inivesi o se faigamalo i le iunite o le aiga. A matau atu i le tulaga o faafitauli faalenuu i nei aso, e talitonu e maua le tali i le tapu'e o le lotoifale o aiga. I Samoa i aso la sa nonofo faatasi matua matutua ma a latou fanau ma fanau iti. Sa ave'a le 'aumatutua ma faia'oga i fanau i le tausiga o a latou fanau ma aiga. I nei aso ua le toe faapena, ua nofo lava le teine ma le tama ma fai lona aiga, ma faapea ona motusia ai le so'ofau taua sili ona mana'omia e ulugalii talavou i nei taimi.

O nisi o faiganuu aupito lamatia e aofia ai uso Maori. Ae le malaese foi o tatou tagata. Upu moni a talanoa i ma'i o tamaiti ma faama'i masani, e le o talanoa i North Shore ma Herne Bay i Aukilani, a o itumalo na e alala ai o tatou tagata. Faapea foi i isi taulaga. Ua pine e le tupe tua'oi o nofoaga ma le tulaga o aiga ma fanau e oo lava i ma'i.

Fai mai le UNICEF e silia i se 40 afe fanau e si'i atu i falema'i i tausaga ta'itasi. Tele o na ma'i e mafua mai i fale e le lelei ona puipui mai le malulu. A le o lena o le fe'oma'i ma lamatia ai i faama'i pipisi.

I le itu i sauaga, pe a ma se 70 afe e faamauina e leoleo i le tausaga, tusa lena ma se 200 e lipotia i vaiaso ta'itasi. Ae le ta'ua isi e le o lipotia. A tuu lena ata i le faavaa o le Koviti ona maua lea o se manino i le mauiluga o le lu'itau o loo feagai ma Niu Sila.

E le siligia le ave'a o le maliu o Malaki o se faamanatu mo tatou uma, a leai ni tomaki e tausiga ai fanau ma aiga, e au ina tatou uia fo'i le ala lea na uia e lona faaosala (ui ina e leai se agasala a le atalii na fai).

O se faamanatu fo'i i le suiga o lagona i se lalolagi ua vaai ifo lava le tagata ia, le aiga ia, le nuu ia; ua ama ai le manatu atu i mafatiaga o isi mā latou fanau. Ua manino i le tala ia Malaki le le manatu mamafa o e sa tatau ona lave i le atalii i le itula sili le moomia ai.

Mai le tilotilo faaKerisiano, e leai se taimi sili ona fetai i ai le fe'au faaso'o lea sa molitino atu e le Alii i ta'ita'i o lona nuu, i mafatiaga o tagata. Le fe'au a Keriso i le ata o le Samaria Agalelei, e tu e fesoasoani, tainane e le aiga pe nuu pe tapua'i faatasi. O se fe'au e faalavelave mai i o tatou lotofuatiaifo.

O NI TAOFI O LE AUFATAU I LE AUTU:

“Ou te le tuua'iina atoa le mafine na faia lenei mea matuiā, e tuua'iina fo'i matua – ma isi”

Tia, Seattle Amerika

A TUPU SE MEA faapea e muamua lava faasino o tatou lima i le na faia. E sa'o ae ao ona tatou tilotilo atili ma fesili pe aisea.

E leai se tagata ola na fai e le Alii na te le iloa lana mea e fai. Auā e tupu a'e le tagata ma se lotofuatiaifo, e iloa ai faavasega le lelei ma le leaga.

Afai la ua na le iloa le leaga o lana mea e fai, lona uiga e leai sona lotofuatiaifo, poo le mea foi ua masaesae. Po ua ma'i lona mafaufau. Tatou te faalogo pea i tala ia i latou e faia nei amio e o mai i aiga malepelepe.

Vaitogi, Hawaii

Ou te le tuua'iina atoa le mafine na faia lenei mea matuiā i le atalii, e tuua'iina fo'i matua, ma isi. E tuua'iina fo'i pulega faalemalo. E tuua'iina faiga faailogalanu, e tuua'iina le valea e mafua mai ona o faiga faailogatagata.

O le tali fo'i lea i le tele o faafitauli, ia siitia le malamalama o tagata, ia faamalosi mafutaga e maua ai le ola felagolagoma'i.

E iai mea tutupu i fanau e iloa e nisi ae le tautatala, o se agasala matuiā lea i so'u taofi.

“E tatau i le malo ona su'esu'e lelei tala'aga o e tausia fanau”

Mafutaga, Aotearoa

E TALITONU ua tele ni taofi fa'aali i lenei mataupu, talu ona tula'i mai. Ae e lelei ona tilotilo le malo i nisi o vaega e tatau ona faaleleia i lana auauunaga i fanau.

O lo'u manatu, e tatau i le malo ona su'esu'e lelei tala'aga o e tausia fanau. E pei la o le mataupu lenei i le atalii ia Malaki. Sa tatau i le Oranaga Tamariki ona fai se siaki auiliili o le tausitama. Moni o le filifiliga a lona tina, a ua tatou iloa le le auga o na filifiliga, auā e fai i le va lelei ae lilo atu i le vaai ni agavaa faatausitama o le e tuu i ai le tiute.

Pogai, Ausetalia

A tete'a se aiga, o le fesili o ai e sili le agavaa i le vaiga o le fanau? Aisea e tuu ai i le tina pe afai ua faamaonia sona le agavaa e faia lea? Aisea e le faitauina ai matua matutua poo se isi o le aiga e tau i ai, i lena filifiliga taua?

O le isi mafine e ta'uta'ua i le TikTok lea na molia ma lona to'alua i le oti o la'ua tama pepe iinei. Na ou tau ane fo'i i le tala o se alii iina ua lafo nei i le to'ese, 9 tausaga. Sa tuu i ai le vaiga o se fanau a o to'esea matua i mea faalelotu, ma soli ai e ia tapu o le va tapuia.

O se fafagu lea mo tatou uma matua, se'i vaai fanau 'aia le tia'ia na o latou ona o le faanoi o mea a le lotu. Se'i o nisi ae nonofo isi. Ta'uvalea ai le igoa o le lotu ma Iesu, Talofa e.

Ne'i Mea Ane ua Galo

Laasia 30 tausaga talu le filifiliga a Samoa e palota le luafulutasi



I LE FAAMAU a le Savali, pepa a le malo, o le aso 31 Oketopa 1990, ua tamau ai le iuga o le filifiliga a Samoa i le mataupu e pei ona ta'ua i luga. E le'i ausia le 50 pasene o le aofa'i na palota peita'i na lava lena e faavae ai le tusiga o le tulafono, e mafai ai ona palota le 21. Ma tu'imau ai se pine o se faaiuga tuese i le folauga a Samoa. E leai se tasi na manatu e mafai ona sosofa le faavae papa o le pule faa-Samoa, e pei o upu o le pese, ua tofia e le Atua Samoa ina ia pulea e matai. E lei faapea mai le pese, e sau se taimi e pule ai foi ma taulele'a ma le tinifu. Afai la e sa'o le pese lona uiga e fesiligia le tofa na pasia ai le tulafono.

E le faigata ona matau aga o le pelepesite ma lona iuga, na o se 5 pasene na malo ai le finau a e e lagolagoina. E manino le fe'au, e le o se mataupu faigofie. E manatu nisi 'ana se mea e palota uma Samoa—poo se 'afa o lona faitau aofa'i—e le pine e tafea le lafo a le malo. Ae e iai ni vaega taua o le finau e lagolagoina ai le malo. Muamua, saunoa le palemia, Tofilau Eti Alesana, o lenei fuafuaga o le a taliina ai le fesili poo le a se mea e fai i le faama'i ua pepesi i le atunuu. I le faatupula'ia o matai i le naunauga e fia maua le numera malo i faiga palota. O le i'uga, ua sosofa ai tapu o le va nonofo o aiga, ona o le naunau ia maua le tofi faipule.

O le fesili pe iai se sootaga o lona faiga ma le tatalaina o le palota i le 21, e le o manino se tali i ai; auā i se matau lautele, e le'i suia e le 21 le naunauga e faasafua suafa o aiga. O le mea moni ua faatetele ai.

Fai mai le finau e lagolagoina lea faiga, ua ola aiga, ae pei ona ta'ua e nisi o le 'aumatau lauulu (taga'i fo'i i le faasoa a Tuia, itulau 9), e le o se faa-Samoa le faatau o suafa taua o aiga i ni tupe, auā ua manino auofala i le pogai lilo i tua o faiga saofa'i a aiga i nei aso: O se talimana'o i e fia matai ona o mafua'aga tau tofiga ma galuega, ae faapea foi le sa'o na faama'itea le faiga saofa'i, o loo fia maua se tupe mo ana foi mafua'aga.

E pei ona ta'ua e Tuia i lana pepa, e lavelave i'u o lenei faiga, muamua, ua ta'ufaatauvaina ai tu ma aga mamalu tau le faasinomaga o Samoa i e tausaga aiga ma e e faia le faiva tautua.



~ OKETOPIA 17-31 ~

17

1832 Toe asia Samoa e loane Viliamu i lana malaga lonalua

1975 Tatala Falema'i Tupua Tamasese i lona faafouga

1998 Sunui fale o se aiga, saisai ni tagata i Salamumu, i le pule a matai o le nuu

19

1932 Lomia faitioga nusipepa Pacific Islands Monthly faasaga i pulega faailogalanu Niu Sila

20

1956 Mae'a galuega o le toe tilofia o le Tusi Paia Samoa i ni 'alosasi i le sipela

21

2014 Malia alii fusu Tuna Scanlan i lona 80

23

1971 Ulua'i fonu a le palemia o Samoa ma sui o le 'aufaasalalau tala

25

1945 Faitauga aofa'i o Samoa iloa ai ni fanau e tusa ma se 1600 e suli mai i fitafita Meleke

26

1839 Taunuu i Apia malaga a Charles Wilkes

1839 Taunuu i Apia le Camden malaga mai ai Misi Parate lona to'alua ma Alisi

1995 Faipa'aga Manu Samoa & Fay Richwhite faailoga ai le ulufale o Samoa i le faapolofesa

27

1939 Aso fanau alii fatusolo, Albert Wendt soifua i Apia atoa ai lona 83

1998 Togia Savea Sano Malifa i le faailoga Commonwealth Press Union Astor Award

28

1960 Saini e sui o le fonu faavae le ulua'i atatusia o le Faavae

1960 Tatala le Falefusi faamanatu a Nelesoni

1965 Tatala le uafu tele i Apia e le vaa o le Esperato Santos

1977 Tatala telefoni vili

1978 Tatala le falegaosi 'ava o le Vailima

29

1926 Ulua'i fonu i le maketi i Apia o le soofaatasi a Samoa ma papalagi e faaleo atu atugaluga i le malo

1997 Amata valaau a le mau Tumua ma Pule i le malo e faamavae

30

1946 Fonu faapitoa ta'ita'i o le malo Francis William Voelcker ma le Fonu Faitulafono ma Fautua e talanoa i le mataupu i le pule faa-

tausimea faamalumaluga a Malo Aufaatasi

1860 Taunuu i Samoa le misionare Uesilliana Siasoi Palauni ma lona to'alua

31

1839 Saleimoa. Lauga faamavae loane Viliamu mo le malaga ma misionare Samoa, malia ai i Eromanga, Niu Eperiti poo Vanuatu i nei aso

1990 Pelepesite mo le palota a le 21 tausaga, lagolagoina e le 19,392 (49.3%) i le 17,464

(44.4) na tete'e, palota lē aoga 2,474. E 39,328 le aofa'i na palota

I le iuga o le palota o le 1991, lea na palota ai le 21 mo le taimi muamua, na malo ai le HRPP i le 26 i le 18 a le SNDP.

E ta'u mai, e le o se mataupu lenei e sui ai se faigamalo. Ae pei ona ta'ua, e le o suia ai le faiga fou lenei o le faasalafa o suafa matai o aiga.

O se mataupu fo'i tele ni taofi o le atunuu e fai i ai. Sa lauliliu foi e le palemene talu ai, mafua ai se taumafaiga a le malo i lea taimi, e faatapula'a le aofa'i o sa'o e tausaga se aiga.

Saunia LPSL Tavita



O se vaaiga i le taulaga o Apia i vaitausaga onosefulu ma le fitusefulu. Ma sui malie mai ai le vaaiga i tausaga valusefulu ma sau ai. Puleiata, faamauiina

UILI FAU UPU

Saili tali o fesili o lo’o i lalo. Pule oe pe sipela i luma (clockwise) po’o tua (anticlockwise).

E sa le feosoosofa’i.

1. Ta’u mai ni uiga se lua o le upu *taga* i le Igilisi:

2. Saili ni nauna se 5 e faai’u i le fasiupu *taga*

3. Su’e se upu e 9 mata’itusi ma tusi sona fa’amatalaga:



4. Tusi uma upu/ fuiupu e ta’i 3-9 mata’itusi, ma o latou soa i le Igilisi (E faitau ai ma upu ta’ua i le 1, 2 & 3)


Lelei atoa = 12 upu

Lelei tele = 8 upu

Lelei = 6 upu

PASO I GAGANA E LUA

Faatumu i upu/igoa o le gagana Peretania e soa ma upu Samoa. **Fill crossword with English equivalents.**



Faalava~Across


- 1 amio fa’aaloalo (6)
- 4 taulaga o Samoa (4)
- 8 laina (4)
- 9 fuala’au ’aina (6)
- 11 igoa o se ata tifaga tamaiti (2)
- 12 pagota (7)
- 15 faigofie (6)
- 19 faapuupu, i le vave e mafai ai (4)
- 21 faamanatuga (11)
- 22 faapuupu, upu asosi (5)
- 23 fetu o se na fanau ia Aperila 17 (5)

Lalo~Down

- 1 poleni o la’au (7)
- 2 fanua, eleele (4)
- 3 ia (2)
- 5 perenise (pelulale) (7)
- 6 atoa fo’i (4)
- 7 ave le taavale (5)
- 10 mālū le tau (4)
- 13 taimi afiafi (2)
- 14 ‘aulakapi Niu Sila (1,1)
- 16 o ni manatu, taofi (5)
- 17 Igoa Italia, lona uiga e muamua, numera tasi (5)
- 18 tupe a nuu Europa (4)
- 19 o se e faatino se tala (5)
- 20 mau to’atasi (5)

FA’ASOA TONU LE IGOA OLE I’A MA LONA ATA

1. alogo
2. gatala
3. atu
4. anae
5. malau
6. tifitifi



Galuega fa’aopoopo:

1. E iai ni aoga o nei i’a i le si’osi’omaga?
2. E iai ni upu a Samoa e fai i ai?
3. O a ni faailoga e tulagaese ai?

SUDOKU: Faatonuga:

Fa’atumu pusa numera (tama’i sikuea) i fuainumera 1 i le 9. Ia uma ane le galuega ua maua atulaina ta’itasi (tu, fa’alava) o iai le 1 i le 9. E tofua le atulaina ma lona fa’atulagaga e ese mai le isi.

SUDOKU ~ TAALOGA I NUMERA (sudoku.com)

2		1						
	6	7			8			9
		5	1			7	3	4
	8		2	5		1		7
5		9			7	3		2
	2		9	1			6	8
1	7				5		2	6
9		3		2	6			1
						4		3

LAUFATU SAMOA: O SE TALA I LE ALOFA MONI

E tauaso le alofa



NA fetui Masina ma Mataio i se fa'aipoipoga. O le fa'aipoipoga lea na mafua ai ona masani, alu a'i ua fai fo'i la la'ua fa'aipoipoga.

E le'i iai ni aso o le fa'aipoipoga ae maua Masina i se ma'i faigata. Ua to'ulu ai lona lauulu ma sola ese ai lona lalelei. Ua popole fo'i pe o le a se manatu o lona to'alu ia te ia.

Ua lagona atu upu faifai a isi, ae le popole i ai Masina, na o lona lava to'alu o loo mamafa i lona mafaufau.

Ua iloa fo'i e Mataio le alofa o lona to'alu ia te ia, ua mafaufau i ai.

Alu a'i le mafutaga, ma i le tasi aso na malaga ai i se fono a lana galuega e fai i Amerika. E lua aso na to'esea ai ae vili mai i lona to'alu. O se tala e faate'ia ai, o ia ua amata ona po lana va'ai.

Sa fai sona siaki e se foma'i ma ua fa'amaonia ai toe o se vaiaso ona le toe va'ai lea. Ina ua toe fo'i mai Mataio na faatali atu lona to'alu, i ona foliga fiafia e pei lava e leai se mea o tupu.

"Aua e te popole, faitalia a'u ona ta'ita'i oe ma fesoasoani i mea uma," o lana ta'utinoga lea. Ma sa fa'apea lava ona fai, ua avea nei Masina ma sulu o lona to'alu, o le fesoasoani i mea uma tau i lona soifua fiafia.

Ua faasolo pea aso o le mafutaga. Ua talia fo'i e le tasi le isi i o la'ua mafatiaga. E peisea'i ua avea na ma ni malosiaga ae le o ni faafitauli. Ua avea le vaai o Mataio ma auala o le fiafia o Masina, ae avea le fiafia o lona to'alu ma taulaga o le alofa o Mataio.

Ua tele aso o le mafutaga, ona maliu lea o le tina. Ua faanoanoa lava le tamā i le mafutaga mafana ua motusia. Ua sauni fo'i e tu'ua le aai sa nonofo ai, ae alu atu e nonofo ma lona afafine.

I le tasi afiafi a o sauni Mataio e tuuvaa ese, na asiasi ane ai lona tua'oi, le toea'ina o Siaki. Ua fesili, "E faapefea la ona e alu ua leai si ou to'alu sa fesoasoani?"

Ua faliu ane Mataio ma pulato'a i lona tua'oi, ma faapea atu, "Va'ai oe Siaki, ou te le tauaso, e le po la'u vaai. A ua mafua ona ou faafoliga i se tasi ona o lo'u alofa i lo'u to'alu."

"Auā e sili atu le tiga ia te ia o lo'u va'ai atu i ona mafatiaga nai lo ona lava tiga o loo tauave."

"E sili ai ia te a'u lo'u faafoliga ou te le o toe vaai atu i ai. E tupu ai lona fiafia. Atoa ma lenei, ou te le'i alofa i lo'u to'alu ona o sona 'aulelei, ae na ou alofa ona o se tagata lelei."

"Afai o se mea sese lea ua ou faia, le Atua faamagalo mai a'u, a ua ou faia lava mo lo'u to'alu."


Ua tu i luga le toea'ina o Siaki, ma lulu lona ulu, ma faapea lana upu,

"Na ou tau iite lava. Fai mai lo'u to'alu e tilotilo atu o loo e omiomia le microwave; ae o la e fai le togalaau o Masina." Ua 'ata'ata Siaki ma 'u'u lona gutu, ona faapea lea si ana upu, "Ia, ae soia, e leai se mea e le mafai ona fai e le alofa."

O le faatautu o le tala: A e alofa faamaoni i lau paga, ona faigofie lea ona e talia o ia ma faalilo ona vaivaiga ma ni le atoatoa; pe maua i se ma'i faigata pe sola lona 'aulelei, alofa pea.

Auā e iai taimi e tofotofoina ai le alofa, ona iloa lea o le alofa e gata i le pa'u ma lena e tōtō aano.

ATA: MAUALAIVAO ALBERT WENDT



Lefaga

Albert Wendt

O loo faitau e galu 'ava-sisina o'u tausaga e fafati i le a'au a Lefaga

Penisula o Matautu, niu ma fale e fofotu a'e 'ai papa uli, lolou'a aga'i i le ita o le sami;

i gutu o manulele feilafi o le sami le la ua laveia, o se i'a iila ua tuufea'a.

A o ou savalia amu nuti i luga o le matafaga ma le tauafiafi o loo faatau sunu'i le tafālagi,

na fesoata'i lo'u ata ma le pouliuli i le mea ua o atu i ai o'u tamā.

~ ~ ~ ~ ~

O se faamatalaga o ata ma le solo

Ata i luga a'e faaigoa e le tusiata o le Amataga, o lana faaliliuga o le tala o le foafoaga. O le isi ata o lona igoa o le Fetu Uliuli, o se tasi faatusa e iloga i galuega a le tusitala. E pei ona iai le Nuanua Uliuli (tala fatu) ma le Tusi i le Fetu Uliuli (tusi o solo).

O le solo o se mata'ituga latalata i laufanua o Lefaga e fesoata'i i ai le fatusolo i lona gafa. O se matau toto'a i le natura ma aga o se aso ma le faamanatu a le afiafi i le iuga o le savaliga. O le pouliuli e le o se mea e mata'u ai a o se vaega o le gafa e ao ona so'oa pe a sau le taimi.

FAAMATAI MA SUIGA: SAUNIA E TUIĀ PAEPAE LETOA

E sui loa faiga, ua leai se tāua o faavae



Folasaga

E fa'atulou ma fa'atalofa atu i le paia i le susu o le Aufaigaluega a le Atua, afio i lau Afioga i le Tapa'au ma tulaga fa'alupe o le Lunivesete,

fa'apea le paia ma le mamalu o le atunu'u i ona Tupu ma ona Ee, faapea le mamalu i le au Puputoa ma le au Fueloloa o le Atunu'u. Talofa lava.

O le a vaipā ia lo'u gutu ne'i mea ane ua sipa se lamaga i se fa'amatalaga ona faitauina lea o lo'u tagata. O lena ua nofofale i le 'a'ai o finagalo le 'autū o lenei fa'afaletui e fa'apea; "e sui faiga ae tumau fa'avae."

O 'ese'esega o le upu faiga ma le upu suiga. O upu nei o le FAIGA ma SUIGA e tatau ona matua autala ma āu'ilī'ili lelei lona 'ese'esega, ona o lea ua taumafai ni isi e fa'apea mai, o faiga o suiga lava ia. Ae peita'i o nei upu e lua e 'ese'ese o lā uiga ma le fa'atinoga. O le uiga o le upu FAIGA, e sau mai le upu FAI. O lona uiga o se mea e faia e se tagata po'o le faatinoga o le upu faiga. O Faiga la, o lea e ave i ai le fa'amamafa a le faipepa, o faiga ua afaina ma lavasiga ai Fa'avae taoto o le Aganu'u.

O le fesili la e ao ona mua'i manino, "E fa'apefea ona tumau Fa'avae pe afai e sui faiga e fa'atino ai Fa'avae." Ae peita'i o ni suiga lelei o le soifuaga i Samoa nei, e mafua mai i ni a'afiaga o tu ma aga mai fafo mo le atia'eina o le soifuaga i totonu o aiga, nu'u ma le atunu'u, o le 'ā lē tāēa lea i le tautalaga. Ou te talitonu o ni suiga lelei e fetau lelei i lo tatou soifuaga, o se tulaga lelei e tatau ona aputiputi.

Ae peita'i e iai fo'i suiga i totonu o lo tatou atunu'u ua alia'e mai, ona o a'afiaga o tu ma aga mai fafo, lea ua le mafai ona fa'amalieina ona tulaga lelei ma le matagofie e pei ona vaaia i fafo, talu ai ona e lē 'o gafatia e o tatou tagata ona 'ausia le tau po'o mea faitino e fa'amalieina ai tulaga lelei ma le matagofie o ia suiga, ma e tele lā ni fa'afitauli ua tula'i mai ona o lea tulaga. O le a taoto ia la lea tulaga i suiga fou, ae o le a aga'i sa'u fa'amamafa i Faiga ua afaina ai fa'avae taoto o le Aganu'u ma Agaifanua o aiga, nu'u ma le atunu'u, ina ua sui faiga lea ua afaina ma satia ai FA'AVAE.

O le upu la Faiga fou, o se mea ua faia e tagata Samoa i Aganu'u ma Agaifanua ua oia ai Fa'avae taoto o le Aganu'u.

Ou te talitonu e ao ona malamalama lelei i le uiga o le upu AGANU'U ma le upu AGAIFANUA. O le Aganu'u ma le Agaifanua i le fa'auigaina e le Tulafono o Fanua ma Suafa 1981 i lona Fuaiupu 2(a) (b) e faapea : "Aganuu ma Agaifanua" po'o aganuu ma agaifanua a Samoa, o lona uiga o aganuu ma agaifanua a Samoa ua talia e pei ona fa'amamaluina i taimi e fa'asino i ai ma e aofia ai; tulaga fa'avae tau le Aganu'u ma Agaifanua ua talia e tagata Samoa i le tulaga aoao ma - Aganuu ma Agaifanua e pei ona o lo'o fa'amamaluina e fa'atatau i se nofoaga po o se mataupu fa'apitoa.

O lo'o matua manino lelei le Tulafono i lona fa'ata'atiaina o fa'avae tau le aganu'u ma le agai-

fanua ua talia e tagata Samoa i le tulaga āoāo. O le aganu'u lā ma le agaifanua o fa'avae o matai Samoa i lona tulaga aoao, o le "MATAI FILIFILIA ma le MATAI TOFIA," lea o le a aga'i i ai se fa'amatalaga i lenei taeao i le afaina o Fa'avae ona ua sui Faiga i le faasafuaina o suafa matai Sa'o.

O le Matai Filifilia ua taliaina i lona tulaga aoao, o le suafa matai e pulea fa'a-suli. I se isi fa'aupuga o le suafa e filifili e Suli. O le matai filifilia lā, o le matai sa'o, o le pule poo le aia tatau a suli e filifili ai so latou matai sa'o e aga i ai le pulea ma le tausiga o measina a le aiga ma le suafa.

O le Matai Tofia, o ni matai e tofia e le matai filifilia po'o le matai sa'o e fesoasoani i le fa'afoeina o le aiga ma le puipuiga o tofi ma measina a suli o le suafa sa'o. Ae le gata i lea, ia sologa lelei le laina o feso'ota'iga ma pulega lelei i totonu o le aiga.

Ma o lea la o lo'o manino lelei i le folasiaina e le Tulafono o Fanua ma Suafa i le tulaga Fa'avae o suafa Matai Sa'o ua talia e Samoa i lona tulaga aoao



e tatau lava ona tasi. O le matai na filifili e suli, o se filifiliga e fai to'atele e filifili se numera tasi.

I se isi fa'aupuga, o le filifiliga a suli e filifili se Matai Sa'o e tasi. Ma suafa matai Tofia, e tofia to'atasi e le matai filifilia po'o le matai sa'o ni matai se to'atele po'o ni matai pitovao e fesoasoani i le fa'atautaia ma le fa'afoeina o le aiga ma puipui tofi ma measina a suli o le suafa filifilia po'o le suafa sa'o.

O se vaivaiga la o lo'o taumafai e autalatala atu e fa'apea, o lea ua folasia manino i fa'avae o le aganu'u, e iai suafa matai e mafai ona fa'asafua, e iai fo'i suafa matai e lē mafai ona fa'asafua e tusa ai ma le fa'amalieina o mana'oga o le Aganuu. Ou te lē 'o talanoa atu lā i le fa'amalieina o le tupu ma ola o se aiga, po'o le fa'amalieina o se mana'o o se suli po'o se tagata. A o lo'o taumafai e talatala atu le afaina ma lavasiga e tula'i mai, pe afai e le mafai ona fa'amalieina mana'oga fa'avae o le aganu'u, e ala i le fa'asafua o suafa matai sa'o o aiga.

O mana'oga fa'avae o le Aganu'u, o le suafa matai filifili ua i ai ona lagisoifua e fa'apei, o le pule, o fa'amanuiaga, o lona fa'asinomaga, o tiute ma matafaioi e le mafai e le suafa matai tofia po'o matai pitovao ona agava'a i ai, ua na o le matai filifilia lava po'o le matai Sa'o e agava'a i ai.

O tapu ma sāsā o se suafa Sa'o, o le agaifanua lea

e fitoitonu i se suafa sa'o i totonu o lona lava nu'u e le mafai ona faatinoina i se isi nuu. Ma o lea faavae o lo'o faamanino lelei mai e le (b) o le Tulafono o Fanua ma Suafa e faapea, "o se aganuu ma agaifanua e faatatau i se nofoaga po'o se mataupu fa'apitoa."

O le mataupu fa'apitoa la, o tapu ma sasa o le suafa Siaki e tatau ona aloaia ma fa'aaloologia lona fa'atinoina i totonu o le nuu lava o Siaki, peita'i e le mafai ona fa'atinoa lea tulaga i se isi nu'u.

O le uiga lea ma le fa'atinoina o le agaifanua. O ni aga e fa'asino lava i le fanua po'o le suafa Siaki i lona lava nu'u. O le uiga fo'i lea e tele ona faalogoina ai le upu lenei, "E tupu lava le tagata i lona nu'u."

Fa'asafua o Matai Sa'o o le fa'ataute'e i le Tulafono aganuu ma agaifanua.

O le fa'asafuaina la o suafa matai sa'o, o le fa'ataute'e lea i le Tulafono, Aganuu ma Agaifanua a Samoa e tusa ma lona tulaga fa'avae. Aua o suafa matai sa'o i lona tulaga fa'avae o le pule ma le aia tatau a suli ma le aiga potopoto atoa e filifili ai se matai sa'o. Afai la ae filifili fa'aitūpaepae, pe fa'afuaifale, pe fa'amatāfale se suafa sa'o, o lona uiga ua malepe le fa'avae o le pule ma aia tatau a suli uma ma le aiga-potopoto e filifili ai se matai sa'o e tusa ai o Tu ma Aganuu o lo'o fa'ata'oto mai e le Tulafono o Fanua ma Suafa.

O le fa'apea mai la o le autu e sui faiga ae tumau fa'avae, o se fuaitau e faigata ona taliaina e le faipepa, ona ua le tusa ai ma Aganu'u ma Agaifanua a Samoa i lona tulaga fa'avae ma lona taliaina aoao tetele.

Sui faiga ae tumau fa'avae.

O le autalaina o lenei fuaitau po'o lenei fatua'iupu, o se fatugagana o lo'o fa'alogoina pea i taimi e utuvagagana ai faleupolu. O se fatugagana po'o se fatua'iupu, o lo'o talatala ai le atotonapona a tulatoa ma tula o malae o le atunu'u. Ae o se muāgagana fo'i o lo'o fai ma suaga a le mamalu lautele o le atunu'u i talanoaga faifai pea.

O lenei fatugagana po'o lenei fatua'i'upu e ao ona tamua i ai se talitonuga a lo'u tagata, pe o se fuaitau e sa'o ma tonu e tusa ai ma le soifuaga o le tagata Samoa i Tu ma Aga a ona fa'asinomaga. O le mea lea ou te fa'apea atu ai, ou te le ioeina lea fuaitau, "e sui faiga ae tumau fa'avae." E sui loa faiga, ua malepe fo'i fa'avae. I se isi fa'aupuga, e sui loa faiga, ua leai se taua o Fa'avae.

O Iesu Keriso lava ia e le liu ananafi ma le aso e oo lava i le fa'avavau. O ia foi na saunoa, "Ou te le'i sau e talepe le Tulafono ae ia fa'aatoatoa". O le tala foi a le Tusi a Failauga 1: 9, "E leai se mea fou i lalo o le la." O lona uiga, so'o se fa'avae pe fa'aleagaga pe faaleāganuu e tumau e fa'avavau. O lenei fatua'iupu po'o lenei fatugagana ua masani ona fa'aaoga e faleupolu e malie i le faalogo, ae peita'i o lona fa'aaogaina e fai lea ma 'alofaga po'o se si'omaga e lalafi ai i tua faleupolu i le faia o se mea sese po'o se mea fou e suia ma afaina ai fa'avae o le mea o lo'o fetalai i ai.

O le mea lea ua tatau ai i le au puputoa o Afiō'aga, lunivesete, Matagaluega o Tu ma Aganuu ma le Faamasinoga ona ta'afi manino, ta'afi talatala ma ta'afi nonoa e uiga i lenei fatugagana po'o lenei fatua'iupu, pe ua talafeagai lea fuaitau i le fa'aaogaina i le gagana tautala i totonu o a'oga.

(Fa'aauau itulau 10)

O le mea lea, ou te fa'afetaia ai i le tofa ua a'e i le Tapa'au ma le mamalu o i latou o le lunivesete o lo'o taulamua i le autalaina o lenei autu, aua le silafia e teine ma tama a'oga o a'afiaga o lenei upu i le soifuaga i Samoa nei ma le fa'atinoina o a latou Tu ma Aganu'u mamalu a Samoa o lo'o tiu ai.

O le fa'amasani pea e tautala i ai i lenei fatua'i upu, e avea ai lenei fuaitau e limata'ita'i seseina ai o latou talitonuga i le fa'atinoina o Aganuu fa'avae a Samoa.

Autu : "Lavasiga o Fa'avae o Suafa Sa'o, ina ua sui faiga i le fa'asafua o Suafa Sa'o o aiga." Ulufatuina o Suafa Matai.

O le avea ma se matai, o se tofi po'o se vala'auga mai le Atua. O se ua fa'amamaluina e vaelua i ai le suafa o le Atua. O se vala'auga na afua mai i le nu'u o le Atua, e pei ona folasia manino mai e le Tusi a Kenese 36, e ala i usuga e tolu a Esau i fafine Kanana, lea e maua ai matai o le aiga sa Heti, Sa Hivi ma sa Hori ma amata ai loa le nuu o Esau i Etoma. Usu Esau ia Ata le afafine o Ailona le sa Heti fg o Elifasa. Toe usu Esau ia Alipana le afafine o Sepeona le sa Hivi fg o luso, Ilama ma kara. Toe usu Esau ia Pasemata le afafine Isamaeli fg o Reuelu. Ma na avea ulumatu-tua o nei usuga e tolu e fai ma alii sili o ituaiga e pei ona ta'ua i luga. Ae o latou suli lea na tofofi ai matai pitovao o le nu'u o Etoma.

O le ulufatuina la o suafa sa'o o aiga i le nu'u o le Atua na amata mai lava e tasi. Ma sa fa'apea fo'i le tulaga na fofoa mai ai suafa sa'o i Samoa nei. O suafa sa'o o aiga o se tofiga ua mautu lona fa'avae ua atofaina e ala i le pule, lagisoifua ma fa'asino-maga, la'ei ma lauvae, tapu ma sasa o suafa sa'o o aiga, lea ua afaina ina ua fa'asafua suafa sa'o.

Ma o le ala fo'i lea o le faiga fou lenei, o le tofia o se Fa'aaloaloga o se nofo a suafa, ina ia mafai ona faatino lagisoifua o se suafa sa'o e tusa ai o faavae o le Aganuu ma Agaifanua. Aua e le mafai e suafa pitovao ma suli o le aiga ona agavaa uma i ai. O le fa'atinoga foi o nei lagisoifua o suafa sa'o, e le mafai e suafa uma o se nofo a suafa ona fa'atofusia i ai i le fa'atinoga o nei lagisoifua. Ma o le mafuaaga tonu lea ua toe fo'i ai le nofo a suafa e filifilia se FA'AALOOLOGA a se nofoa suafa ina ia mafai ona fa'amalieina mana'oga o le Faavae o suafa matai sa'o, o le filifilia o le tasi, ae le o le to'atele po'o le fa'asafua o suafa.

Pule Faa-sa'o.

E talitonu le fai pepa, o le tofiaina o suafa sa'o i aso ua mavae na pule fa'a sa'o, e ala i se mavaega a le Sa'o po'o le Alii Sili o aiga. A o'o ina ifo le la ma taolia fo'i le fale i le soifua o se alii Sili, ona poto foi lea o Faleupolu ma le aiga ma fesiliga le siitaga o le mavaega a se Alii sili, po'o ai e fa'aauuina le gafa o le fale. O ai lava la o suli o le aiga e mavaea'ina e le sa'o, o ia lava lea na te fa'aauuina le gafa o le fale, po'o le nofoia o le suafa sa'o o se aiga.

E pei o le mafua'aga lea e tele ai fa'ai'uga a le Faamasinoga o Fanua ma Suafa i tua atu 1920, sa tele ina faapea mai, "Afai ae uma le soifua o Siaki, e leai sana mavaega e fai, ae toe foi le filifilia o le suafa Siaki i le aigapotopoto." Lona uiga, o mavaega lava a suafa Sa'o na tofia ai suafa sa'o o aiga i aso ua mavae. O le tofia fo'i o suafa Sa'o i aso ua mavae, sa le'i tele ni agava'a mo'omia i se tagata e tofia ai o se matai sa'o. E pei o le tulaga sa lilifa i ai

le tofiga o matai sa'o i aso ua mavae, o le TAUTUA.

Sa le'i tilotilo tele i le poto salalau po'o se tamaoiga, po'o le alofa e pei ona tau fesiligia e le Fa'amasinoga o Fanua ma Suafa i taimi o Fa'amasinoga. E pau lava le tulaga sa tilotilo i ai le tofiaina o matai sa'o: O se tagata sa tautua matavela fa'amaoni, e afua ai le upu Tautua Tuavae. O se tagata e iloa upu o le aiga po'o tapu ma sasa ma lagisoifua

o le suafa ma iloa le Aganuu ma lelei le utuvagana, e afua ai le Tautua Upu. O se tagata e toa e le pala'ai e puipui ma malu ai le suafa ma le aiga, lea e afua ai le upu Tautua Toto.

Ma le suli 'ai tau malele, e le misi i le tautuaina o le aiga i mea e fai poo mea e finagalo i ai le sa'o o le aiga, lea e afua ai le upu Tautua Mamao. E pei o le agava'a numera tasi lea sa ave i ai se fa'amamafa a se sa'o e tofia ai se isi na te fa'aauu le suafa o le aiga po'o le gafa o le fale. Ae peita'i, ina ua fa'atula'i mai le pule fa'asuli, o i tonu lea na tau amata mai ai le fa'asafuaina o suafa sa'o.

Pule Fa'a-suli.

O se tasi nei o faiga na afua ai ona fa'asafua suafa sa'o o aiga ina ua fa'atula'i mai, "le pule faasuli." Le pule lea na amata ai ona tele finauga ma aumai malosi le aia tatau fa'a suli, auā o le pule lea na amata ai ona aga'i mai suli ma aiga i le Fa'amasinoga o Fanua ma Suafa, e saili le pule ma suli fa'avae moni o le suafa. E tele la ni suiga ua amata ona alia'e mai, ma ua avea ai fo'i ma ala ua amata ai ona fa'asafua suafa matai sa'o, auā o le tele o aiga ua omai e talosagaina le fa'aitūpaepae o suafa, fa'afuaifale suafa, fa'afaletama suafa, fa'amāvaevae filifiliga.

O suiga tetele nei ua amata ona tula'i mai ai le fa'asafua o suafa, ina ua pule fa'asuli suafa, ma ua avea fo'i lea faiga ua le mafai ai ona taofiofi le fa'asafuaina o suafa matai sa'o, ona ua tele magavai o le filifiliga, auā e fa'amavevae loa filifiliga o se suafa sa'o i ni itupaepae po'o ni fuaifale o le suafa, ona sa'oloto lea o ia itupaepae i le tele o le fuai-numera e o'o i ai le tele o o latou suafa matai sa'o.

Palota na o matai.

O le isi tulaga na sasao fa'aafi ai le fa'asafuaina o suafa Sa'o, o le vaitau 'a'o palota na o matai i le palotaina o Sui o le Palemene auā, o le fa'amoe-moe autu lava o lea faiga, ia tele ni matai Palota o le Itumalo, ma o se tasi lenei ala na matua saosaoa ai le fa'asafuaina o matai sa'o.

Si'itia le poto salalau ma le tamaoiga.

O le isi tulaga ua vave ai le faasafuaina o suafa matai sa'o, ona ua si'itia le tulaga o le ola a'oa'oina o suli o aiga ma tutupu ai lagona o le taua o le avea ma se matai sa'o, ma ua tutupu ai manatu o suli, "o ai o le a le fia pa'i i vai o le tama." Ma ua amata fo'i ona lagonaina le upu lenei, "o aia faasuli po'o le aia tatau a le suli." Ma o lenei upu o lo'o mafuli lona fa'aleoina e suli ua lava le ola a'oa'oina ma ala i le tulaga o aia tatau fa'atagata soifua.



Ata: Samoa Observer

O ni isi o fanau ua lava le a'oa'oina ma tulaga lelei i galuega ua tutupu ai manatu i le fai o sona suafa matai, ona e matai uma le pulega a la latou Matagaluega. Ona talosagaina fo'i lea e matua le sa'o o aiga, se'i alofagia ma fai se Siaki o la'u tama lua te nofo lua, ona ua maualuga lava lona tulaga i le galuega. Ae o lenei fo'i tama poo fanau i lenei vaitau ua le o toe fia nonofo i ni suafa vai matai po'o ni matai pitovao, ua tagisa lava i se suafa sa'o.

Suli e nonofo i fafo.

O le isi tulaga ua saosaoa ai le fa'asafua o suafa sa'o, o suli ma feoi o lo'o nonofo i fafo. O nisi o tamafanau a suafa ua avea ma failautusi po'o ua mau tofiga i totonu o le aulotu. O lo'o afaina le sa'olotoga e tautala ai po'o le noatia o le fa'aali sa'oloto o se manatu, ona e leai sona suafa matai. Ona Malaga mai ai fo'i lea i Samoa nei ma talosagaina le matai sa'o, ae a pe a fai sona suafa Siaki e la te nofo lua ai e tausi le aiga? E tausi atu e oe le aiga i Samoa nei, ae ou tausia le aiga i Niu Sila.

E le gata i lea, o se fa'anaunauga a matua o lo'o soifua ma ola i atunu'u i fafo, aemaise lava i latou na fananau ma soifua a'e i Samoa nei, i le le mapu o le titi, tātā i le fanau e alolofa mai i le aiga i Samoa nei, ae peita'i o le agaga moni lava o matua ia 'aua ne'i motusia lo latou gafa po'o le pule i le suafa Siaki, ne'i mea ane ua o mai le fanau i ni aso o i luma ae fa'asinosino lima i ai le aiga.

E talitonu o se tasi lenei o ala ua saosaoa ai le faasafua o suafa sa'o, o le taumafai lea o matua e una'i le fanau ina ia lagona le taua o le umia o se suafa matai o aiga. O le ala fo'i lea e mafuli ai le finau a matua i fafo i taimi o talanoaga, e fa'asafua suafa sa'o o aiga.

Una'ia faia o matai tama'ita'i.

O le isi tulaga ua fa'ateleina ai le fa'asafuaina o suafa sa'o, o le tulei malosi a le vaega o fa'alapotpotoga a tama'ita'i o lo'o finauina ma fa'alauiloa le aga tutusa o Alii ma Tamaita'i i so'o se tofiga i totonu o le atunu'u, "e o e fai ni o latou matai ina ia fa'aogaina o latou tomai e tautua ai aiga nu'u ma le Malo."

Ae o le fesili tele o lo'o fetogia'i fa'aso'i o tua'oi e le itupa o tamaita'i ma le itupa o alii e faapea, "se fa'avae o le aganu'u le faia o ni matai o tama'ita'i?" E pule oe i lau tali, ae pau le popolega o le televave ma le saosaoa o lenei suiga.

Ou te talitonu o se tasi lenei tulaga ua matua saosaoa ai fa'asafuaina o suafa sa'o, ona o mea nei o tama'ita'i e ese le televave i le fa'ataunu'uina o ni fuafuaga fai. Ona e fai mai se tasi o talitonuga i nei aso, "ae e fia maua se tala alu i tamaloloa, ae e fia mana'o i se mea e fai, alu i tamaita'i."

(Fa'aauau 11)

Na ou matamata i le Samoa Observer ma ou matauina ai le tele o saofa'i o fai nei, o nisi o taimi ua sili atu le to'atele o matai sa'o tamaita'i nai lo alii. Atonu e le o toe mamao se vaitaimi e sili ai le aofa'i o matai tama'ita'i, nai lo alii. Ma o se suiga leni o le a fa'atelevave ai fo'i le fa'asafuaina o suafa sa'o o aiga. E tele ma anoanoa'i nisi o mafua'aga na fa'asafua ai suafa matai. Ae ou te talitonu o le mafua'aga autu ua fa'asafua ai suafa matai, ona o le tau fa'amalieina o mana'oga o tagata, ona ua si'itia le tulaga i a'oa'oga ma le si'itia o le tulaga o le olaga. Ma le fa'aupuga leni ua fai ma a'upega malos, "ua tupu ma ola aiga."

Lavasiga o le fa'asafua o suafa sa'o.

O nei la mafua'aga uma e pei ona ou tau fa'a-pupula atu e uiga i le fa'asafua o suafa sa'o, ua tula'i mai ni faiga fou ua manunu ai fa'avae ta'oto o le aganu'u, ma ua fa'ateleina ai fa'afitauli po'o lavasiga i totonu o aiga ma nu'u. Ae le gata i lea ua faatupula'ia le taugata o le soifuaga, ona ua mana'omia le tele o mea e fa'amalieina ai lagisoifua o se nofo a suafa.

Ae le gata i lea, ua le mafai e se nofo a suafa ona ola ma soifua i fa'asinomaga ma lagisoifua o le suafa. Ma ua le o toe taua le upu leni, "o le ala i le pule o le tautua," ona o lea ua tai \$1,000.00 le tau o le tele o matai sa'o o aiga.

Fa'aaloaloga

A silasila toto'a ma mata'ituina lelei e le mamalu o sasao nei le uiga ma le agaga tonu o le faiga fou leni a se nofo a suafa e filifili so latou Fa'aaloaloga. O le agaga tonu lava lea na faavae ai e le aganu'u le filifiliga o suafa matai sa'o, ina ia tasi le leo, tasi le ala i malo, tasi le ta'ita'i, tasi le pule ma e tasi fo'i le suafa e mafai ona soifua i fa'asinomaga ma lagisoifua o le suafa. Ma o lea lava ua toe fa'afo'i e le faiga leni o le Fa'aaloaloga a se nofo a suafa le Fa'avae na ulufatu ai le Aganu'u ma le Agaifanua le filifiliga o suafa matai sa'o.

E talitonu la le faipepa ua taua tele leni faiga o le Fa'aaloaloga e toe fa'amanatu mai ai i aiga, e tasi lava le suafa e tatau ona filifilia e tausia le aiga. Aua o le agaga tonu na fai ai le faiga fou leni o le Fa'aaloaloga, ina ia fa'afaigofie ona fa'afae le aiga i le aloaia lea o lagisoifua ma fa'asinomaga ma le pule a le suafa sa'o. Aua o fa'asinomaga ma lagisoifua o se suafa, e tasi lava le suafa e mafai ona soifua ai. Ae peita'i o le faiga fou leni o le Fa'aaloaloga, ua aveesea ai le avanoa o isi o le nofo a suafa e soifua ai i le pule ma le fa'asinomaga ma lagisoifua o le suafa.

O le Fa'aaloaloga o se tasi o suafa o le nofo a suafa ua ave i ai le fa'amamua a le nofo a suafa e aga'i uma i ai fa'aaloaloga ma laei i lagisoifua ma fa'asinomaga o le suafa, ae le gata i lea, o ia e fa'aleoina se finagalo o le aiga i le saofa'iga a le nuu ma ave ma taiulu o le fa'afaeina o le nofo a suafa ma le aiga.

O le fesili ogaoga lava ua tula'i, "Aisea la na fa'asafua ma fai ai le to'atele o leni nofo a suafa pe afai e to'atasi le suafa e mana'omia e le Aganu'u e aga'i i ai fa'atinoga o tiute ma matafaioi a le suafa sa'o, e pei ona toe faia nei e le Fa'aaloaloga a se nofo a suafa?" E foliga mai o le faiga fou leni o le Fa'aaloaloga, o lea ua toe fa'amautuina ma toe fa'asa'o mai le sese o le faiga leni o le fa'asafua o



suafa, ona e na o le tasi lava le suafa Sa'o e mana'omia e aga'i uma i ai faamanuiaga, le pule, Lagisoifua ma faasinomaga ua atofaina i se matai sa'o.

O le fesili la, "o le a la le taua na fa'asafua ai suafa sa'o?" Fa'ata'ita'iga O ni fa'ata'ita'iga e fa'amaonia ai le leai o se taua na fa'asafua ai suafa sa'o. O le tele o suafa o se nofo a suafa, a fai fonu a nu'u ae la e nofonono i lalo o ulu, po'o la e nofo ma talatalanoa ma isi suafa i le umukuka. O le fesili aisea? O le tali, ona e le mafai ona ofi uma le nofoa suafa i le pou e tasi ua atofaina e le saofa'iga mo lea suafa, e le mafai fo'i e le nofo a suafa ona taumamafa uma i le ava o le feiloa'iga.

E le lua ni tofa a se suafa i fonotaga a nu'u. O le fa'asafua la o suafa sa'o o lea ua manunu ai le fa'avae o le aganu'u e fitoitonu i se suafa sa'o. O le suafa Sa'o, o se tofiga ta'ita'i. O se ta'ita'i o se lafu mamoe. A sili atu i le tasi le matai sa'o ona logo ese'ese lea o mamoe. O le fa'avae o le aganu'u, o le suafa matai sa'o, o le Pule. Le pule lea a le matai sa'o, lea ua tau sui i le tausi mea ina talia gofie e tagata, ma aua ne'i logo a i le faalogo le upu pule fa'a-sa'o. Peita'i e tatau pea ona faia le mea moni ma sa'o. O le a le mea moni? O le tali : o le mea moni, o le matai sa'o na tofia e le Atua e pulea aiga ma le Atunuu. O le fetalaiga a le Alii fa'aola, afai e iloa e outou le upu moni e fa'asaolotoina outou e le upu moni.

E fa'asaolotoina i latou o lo'o taumafai e fa'asili i le pule a le matai sa'o, o le malamalama o sulii e to'atasi se suafa sa'o o le aiga e tatau ona tofia ma filifilia. O le anofale atoa o le aganu'u o le Pule. O le pule e afua ai Tu ma Aganu'u. O le pule na fa'ataoto ai aulape po'o fa'avae e taiala ai le va nonofo o tagata o le aiga, le va nonofo o aiga ma le nu'u, ina ia malu le filemu i totonu o aiga ma le nu'u. Ma o lena pule e mai le Atua ia. E leai la se mea o le a tatou taumafai ai fua e sui le upu "Pule" i le upu "Tausimea."

Lavasiga ma fa'afitauli ua tula'i mai? Afaina tupu'aga ma fa'asimomaga.

Ua afaina fa'asinomaga ma tupu'aga o suafa, ona ua to'atele le nofo a suafa. Ua i ai taimi ua tula'i mai ai fe'ese'ese'iga i totonu o nu'u, ina ua taumafai nisi o le nu'u e lu'iina measina a le suafa, ona aga'i lea o le isi o nofo a suafa ua lagolago le itu o lo'o fa'ataute'e ma lu'iina le tupu'aga ma fa'asinomaga o le suafa, ona o ni fe'ese'ese'iga i le va o le nofo a suafa. Su'e lanu i le suafa.

O nisi o suafa o le nofo a suafa, ua faatau le tofi i le 'ai e tasi, po'o ua su'e lanu fo'i i totonu o le nu'u e ala i lona lagolagoina o finauga a nisi o suafa o le nu'u o lo'o lu'iina le pule ma lagisoifua o le suafa lea e suafa ai, ona o se fe'ese'ese'iga a lea nofo a suafa. Ma o le pogai lava o nei fa'afitauli, ona ua fa'asalafa ma fa'asafua suafa.

Afaina le fealofaniga ma le maopo'opoga o le aiga.

Ua afaina le fealofaniga ma le maopo'opoga o Aiga, e talu ai ua to'atele le nofo a suafa ua logo ese'ese ai fo'i le auaiga. Ma ua fevaevae'i aiga.

Ua le toe iai fo'i se mafutaga a le aigapotpoto a le suafa, ona ua manatu ifo lava le suafa ia i lona tino, ae tu'ulafoa'i isi tino. Mai lea faiga, ua malepmalepe ai le upu aigapotopoto i le filifiliga ma le taupulega. Ma ua le toe i ai se fai mea fa'atasi o le aiga.

Faiga fou o le faaaloaloga.

Ua le mafai e se nofoa suafa ona soifua uma i lagisoifua ma laei o se suafa e tusa o fa'avae o Tu ma Aganu'u, ona o se faiga fou, ua fai le Fa'aaloaloga a nofo a suafa. O le toatele o suafa o lea nofo a suafa, ua na ona matamata a'o soifua le Fa'aaloaloga i fa'asinomaga ma lagisoifua o le suafa.

Ua le tautua le upu, o le ala i le pule o le tautua.

Ua leai se taua o le upu leni, "o le ala i le pule o le tautua." O le tautua o le tulaga sili lea ona taua sa filifili ai se suafa matai sa'o i aso ua mavae. Ona o le tagata tautua o ia lea sa va'ai ma fa'alogi i le auala sa fa'afae ai e le matai sa'o le aiga ma le fa'afeagai ai ma le nu'u. Sa ola i aso uma ma fa'afeagai ma le sa'o i mea e fai. Ua na iloa ma malamalama i lagisoifua o le suafa, e puipui ia malu tapu ma sasa o le suafa. O se tagata sa oe i taimi uma e vala'au ai le sa'o. O se tagata sa fofola i luma o le sa'o fua o aga fa'aele'eleaga ma ana fa'atamosali'iga. O le ala lea o le upu leni, "o le ala i le pule o le tautua."

Peita'i o nei aso ua fai saofa'i a le nofo a suafa ma o nisi lava o taimi ua o'o i le ta'i 100 matai e fai fa'atasi saofa'i, o ai lava la e maua le tusaga ta'i \$1,000.00 ma le ie tele, ona fai fa'atasi lea o latou fa'afotu Tupu ma le fa'afotu o le Va'aulu. (Fa'aauau 12)

Mai nei faiga ua le mafai ai ona faamalie faavae o le aganu'u ua atofaina mo le fa'atinoina o se fa'afotu tupu ma se fa'afotu o le vaaulu, ua le mafai ona vaaia aganu'u matagofie, o le paolo o se taualii. Ua avea la nei faiga Saofa'i toatele ua ave'ese ai le fa'atauaina e nisi o le fanau o saomatau ai i le faiga o nei suafa sa'o. O le ala lea o le le manatu mamafa o suafa fa'asalafa i tapu ma sasa o lona suafa.

Pule a le suli moni.

Ua afaina le pule a le suli moni, ona o nisi o taimi ua fai saofa'i a se nofo a suafa mai fuaifale po'o faletama ese'ese o le suafa, ae ua tau fa'aofi ma maua ai lea o le avanoa e fa'aofi mai ai se nofo a se tagata ese i totonu o se faiga saofa'i. O lenei la faiga o le fa'asafua o suafa, ua tele faiga fa'aalatuua afaina ai fa'avae o se suafa sa'o e tusa ai ma filifiliga a suli moni.

Suafa ulufatu ma le suafa igagato.

Ua afaina le pule a le suafa ulufatu, ina ua lui'ina e le suafa igagato. O se tasi lenei o aganu'u ua televave ai le tele o le fa'asafua o suafa o aiga ma ua afaina ai foi fa'avae o suafa. Ona ua i ai taimi ua aga'i mai ai suafa igagato e finauina lagisoifua ma fa'asinomaga o le suafa na ulufatu i le suafa. Ae peita'i o le suafa igagato e le'i i ai i le taimi na ulufatu pe afua ai fa'avae o le suafa.

Ae ua avea ai fo'i lea tulaga, ua tele ai finauga ma vevesi i totonu o nu'u ma afioaga, ona o nisi o suafa igagato o i latou ua maua luga le tulaga o le potosalalau ma maua fa'aailoga maua luga, ona taumafai ai lea e fa'aaoga o latou tomai ma le silafia e fatu ai ni finauga e suia ma talepe ai fa'avae taoto ulufatuina o lea suafa.

Ua fa'atupula'ia Fa'amasinoga o Fanua ma Suafa, ona ua tele manatu ese'ese ma lagona o le nofo a suafa. O le to'atele o se nofo a suafa, ua fa'ateleina ai foi finauga ma le fevaevae'iga o finagalo ma manatu. Ma lenei foi, o le nofo a suafa e aia tutusa uma i le pule, lagisoifua ma fa'asinomaga o suafa. 'Au'upega a le Suli fa'aalualuō.

O le fa'asafua o suafa sa'o, o se tasi lenei o faiga ua fai ma 'au'upega malosia ua fa'aaoga e le suli fa'aalualu ma le fa'aloloto e toe saofagā ai i le umia o le suafa sa'o o le aiga, lea sa umia e lona tamā fa'atoa mavae atu. O le tele o taimi o talanoaga a aiga e filifili ai se matai sa'o, ua atagia ai pea le toe tagisa o se atalii o le sa'o na se'i fa'ato'a mavae atu e faapea, e a pe finagalo malilie lo tatou aiga e toe tu'u mai le avanoa se'i ona toe fa'aauuina ai le tausiga o le aiga, ma fa'amae'a galuega tuua a lona tamā. Afai la ae le aloa'ia e le aiga lea tagisa, ona taumafai loa lea o le atalii lenei e finauina le faasafua o le suafa, ina ia toe saofagā ai i le suafa. Ma o se tasi lea o fa'afitauli o lo'o tupu mai i le fa'asafua o suafa sa'o.

Afaina le vai tagata.

O le fa'asafua o suafa sa'o o aiga, ua afaina ai le vai tagata, ua leiloa e i'u o aiga, ulu o aiga. Ua fai kegi le nofo a suafa i totonu o le nuu. Ua fa'atupula'ia le faitogafiti o le lautinalaulelei i totonu o le nuu, ona ua to'atele le nofo a suafa e fai ma o latou 'alofaga e pupuni ni a latou faiga fa'aalatuua i totonu o le nu'u. Ma ua fa'atupula'ia finauga ma fevesia'iga i totonu o aiga ma nuu.

Fa'amalieina le tupu ma ola o le aiga.

O le fa'asafua o suafa matai o se faiga ua finau malosia e ni isi o le mamalu o le atunu'u e faapea, "o se faiga e fa'amalieina ai le tupu ma ola o aiga." O le fesili la ua tula'i mai, O le fa'asafua ea o suafa sa'o o aiga e faamalie ai le tupu ma ola o le aiga?

Po'o le agaga tonu na fofoa ai e le aganu'u le faia o matai sa'o e fa'amalie ai le tupu o aiga? Po'o le matai sa'o ea o se tofi e i ai ni ona tiute tauave ma ni matafaioi fa'apitoe e fitoitonu i le suafa sa'o e faia i le aiga?

E talitonu le fai pepa ua tatau nei ona toe autalu manatu ma fesiligia le agaga tonu na ala ai ona ta'i tasi matai sa'o na fa'avae ai suafa sa'o o aiga. O suafa sa'o e lei afuafuaina e fa'amalie ai le tupu ma ola o aiga. O le suafa sa'o na faavae: "O se tofi po'o se valaauga ua iai tiute ma matafaioi, pule ma fa'amanuiaga ua atofaina mo lea tofiga e ao ona fa'amalieina ma soifua ma ola ai le ua tofia i lenei tofiga, ae le o se tofiga e faamalie ai le lautele o tagata po'o le tupu ma ola o se aiga."

O le mea lea, e sili atu le tele o fa'afitauli ma fati-atāma'i e tutupu mai i le fa'asafua o matai sa'o i totonu o aiga nai lo le tumau i le tasi o le Matai Sa'o. E afaina fa'avae papa o suafa. E afaina tulaga mamalu o suafa. E fa'aaititia le tulaga mamalu o le suafa ma ua le mafai foi e suli o le suafa ona lagona le taua o le suafa pe afai e fa'asafua le suafa sa'o o le aiga.

Ae o le isi tulaga e tatau ona mata'itūina, o le fa'atupula'ia lea o le fa'asafua o suafa sa'o o aiga.

Ou te talitonu o nei lavasiga uma ua afua mai, ona ua fa'asafua ma fa'asalafa suafa sa'o. O le fesili, O ai e mafua ai?, o le Faamasinoga ea po'o suiga mai fafo? Ou te leai atu, o i tatou lava ua talia nei faiga ua lavasia ai le tulaga o le suafa sa'o i totonu o aiga.

Ma e tele la fesili ua tula'i mai i lenei faiga e fa'asafua suafa sa'o.

Ma o fesili nei ua tula'i mai. O se fa'avae ea lou suafa sa'o e te tutu i lalo o le ulu, ae o la e papae le saofa'iga a le nuu? O se fa'avae ea o lou suafa sa'o, e te si'i laulau i le isi matai sa'o? O se fa'avae ea o lou suafa sa'o, e na'o lou piilima ma faalogo ae o fa'ataoto le tofa a lou nu'u? O se fa'avae o lou suafa sa'o e te le faalagolago i se pou o le suafa, pe e te taumafa i le igoa ipu o le suafa?

O se fa'avae ea o lou suafa sa'o o lou taumafa i le umukuka, 'a'o lo'o taumamafa le saofa'iga i totonu o le maota? O se fa'avae ea o lou suafa sa'o o se ave feau a isi matai sa'o? Afai e te le o soifua ma ola i fa'asinomaga ma lagisoifua o lou suafa sa'o, o le a ea la le uiga o lou matai sa'o? O lou suafa sa'o ea, ua na o se mea e fa'amaufailoga ai lou tagata, pe ua na o se mea e te tiu ai? O le mea lea, sa sili ai lava ona fa'asuafaina oe i se suafa pitovao o le suafa sa'o, e te saofa'i ai i le saofa'iga a le nu'u ma tautua i suafa sa'o o le nuu.

Aua afai e te le soifua ai i lagisoifua o le suafa sa'o, o lona uiga o lou matai, "o lou matai ua na o se suafa e faalagi ai lou matai." E taua lou "iloa" o lou suafa matai, ae silisili ona taua lou soifua ma ola ai i lagisoifua o lou "iloa."

Le paia e, o sasao nei, talofa ua solo le falute, ua masofa le fa ua tafea pulu i vai, ona ua gau le auau sa tau 'aso i ai le fa'avae o le Aganu'u, ina ua lilifa le poutu na tofofi e le Atua e maua'a ai le fa'avae o le Aganu'u.

Talofa e, o lele fo'i ua tausaili se upu e sui ai le upu, "pule fa'asa'o," se'i fa'amalie ai le aia tatau so'onafai. Ae peita'i o lea lava na sa'afi tama fafine a lou 'ele'ele, ae o lea fo'i na tau'ula'ula ai le tauasusu o le tauafiafi o ou taulele'a ma pepese, "Na tofia e le Atua Samoa ina ia pulea e matai, aua o lona suafa na vaelua i ai."

Tumau i ou fa'avae ma lou tagāvai, ona tumau lea o manuia mo Samoa. Fa'afetai fa'afofoga mai.

Faatonu: O le tofa sasa'a a le faipepa e le o atagia ai se taofi o lenei tautua ma le aufaigaluega. O le Afioga ia Tuiā e le tau faailoaina, i lana tautua o se matai Samoa i tiute taua sa galue ai. E momoli le faafetai i lona sao faatupumanatu i lenei mataupu taua, auā le silamaimoa a le aufaitau a le OLA.



**Mental Health Awareness ~
Ola Maloloina i le Mafaufau
la agalelei, sui le talanoaga**